

共同經課 - 1 出埃及記三十二章一節~十四節

1 百姓看見摩西延延無落山，百姓就聚集到亞倫邊，對伊講：「起來！給阮妝上帝，通行佇阮的頭前；因為彼個摩西，就是導阮對埃及地出來彼個人，阮毋知伊抵著甚麼。」2 亞倫對 in 講：「恁的某、恁的子、查某子、耳仔所掛的金環剝伊，提來互我。」3 百姓就攏剝 in 耳仔裡的金環，提來互亞倫。4 亞倫對 in 的手接來，鑄一隻牛仔，用扞刀仔雕刻伊。in 就講：「以色列啊，這是你的上帝導你出埃及地的。」5 亞倫看了，就佇牛仔的面前起壇，亞倫閣宣佈講：「明仔日著守節服事耶和華。」6 隔日清早，in 起來獻燒祭及平安祭，百姓就坐啲飲食，起來滾笑。7 耶和華對摩西講：「去啊，你落去，因為你的百姓，就是對埃及地導出來的，已經敗壞家己。8 in 緊緊離開我所吩咐 in 的路，為家己鑄成一隻牛仔，跪拜伊獻祭伊，講：『以色列啊，這就是導你出埃及地的上帝。』」9 耶和華對摩西講：「我看此個百姓，看啊，是顛顛硬的百姓。10 你今出在我，我欲大受氣 in，滅無 in，用你成做大國。」11 摩西就對伊的上帝——耶和華求情講：「耶和華啊，你啥事大受氣你的百姓啊？是你用大氣力大權能的手對埃及地導出來的。12 啥事互埃及人有話講『伊導 in 出去，是欲害 in，害死 in 佇山中，對地上除滅 in』？求你回心轉意，息你的大受氣，無降災禍互你的百姓。13 紀念你的奴僕亞伯拉罕、以撒、以色列。你曾指家己對 in 咒誓講：『我欲互恁的後裔親像天頂的星許多，閣我所講此個全地，我欲賞賜恁的後裔，欲做 in 永遠的業。』」14 對按呢耶和華退悔，無降落伊前所講的災禍互伊的百姓。

共同經課 - 2 詩篇一百零六篇一節~六節，十九節~二十三節

1 恁著謳啫耶和華！恁著感謝耶和華，因為伊是好；伊的慈愛永遠佇啲！2 是誰會講起耶和華的大權能？是誰會表明伊一切的名聲？3 見若遵守公平，常常行公義者，此號人就有福氣！4 耶和華啊，你用恩惠款待你的百姓；求你亦用這記念我，用你的救恩臨到我，5 互我看見你揀的百姓的福氣，歡喜你的國的快樂，及你的產業相及榮光。6 阮及阮的祖公平犯罪；阮作孽，行歹。19 in 佇何烈造牛仔，仆拜所鑄的像。20 按呢將 in 的榮光換做食草的牛仔像，21 袂記得救 in 的上帝，曾行大的代誌佇埃及者，22 行奇事佇含的地，行通驚的事佇紅海。23 所以，伊講欲滅無 in；若毋是有伊所揀的摩西當決裂的時倚伊的面前，挽回伊的受氣，驚了伊滅無 in。

共同經課 - 3 腓立比書四章一節~九節

1 所以我所疼、所欣慕的兄弟，做我的歡喜，做我的冕旒的。所疼的啊，著按呢倚在佇主。2 我勸友阿爹閣勸循都基，著同心佇主。3 閣真的同伴啊，我也求你幫助此二個婦仁人，因為 in 曾及我同出力佇福音；也及革利免，以及其餘及我同著磨的，in 的名記佇活命的冊。4 著常常惦佇主來歡喜。我欲閣講伊，著歡喜。5 恁的純良著對眾人顯明。主近了。6 一概莫得掛慮，獨獨萬事著用祈禱、懇求，及感謝，將恁所求的排列佇上帝。7 就上帝的平安、搬(pôaⁿ)過一切人所想會到的，欲佇基督耶穌保守恁的心恁的念頭。8 今兄弟啊，結尾來講：見若真實的、見若可敬的、見若公義的、見若清潔的、見若通疼的、見若好名聲的、若有甚麼德行、甚麼通謳啫，諸個恁著數念。9 恁對我所學習，所領受，所聽見，所看見的，攏著行伊，就賞賜平安的上帝欲及恁佇啲。

共同經課 - 4 馬太福音二十二章一節~十四節

1 耶穌應伊閣用譬喻給 in 講：2 「天國比並人君給伊的子備辦婚姻的筵席，3 差伊的奴僕，召所請的來赴筵席，若是 in 毋來。4 閣差別個奴僕，講：『去給所請的講，我的桌已經備辦便，我的牛及肥的精牲已經劊，百項物攏便，著來赴筵席。』5 in 無要緊做 in 去；一個去伊的田園；一個去伊的生理場；6 其餘的掠伊的奴僕，凌辱 in，劊 in。7 人君受氣，差伊的軍兵剿滅許個兇犯，續燒 in 的城。8 就給伊的奴僕講：『婚姻的筵席已經便，若是所請的袂堪得。9 所以恁去大路頭，見若所抵著的，攏請伊來赴筵席。』10 許個奴僕出去路裡，聚集凡所抵著的，無論好歹，婚姻的客廳人客就滿。11 人君入去看人客，看見佇遐一人無穿禮服，給伊講：12 『朋友啊，你無穿婚姻的禮服，怎樣入來遮？』13 伊就靜靜。彼時人君

給諸個差用講：『縛伊的腳手，將伊穴佇外面黑暗的所在；佇遐欲有啼哭、咬牙、切齒。』¹⁴ 因為受召的多，受揀的少。」